

JONA



JONA

Ie poestak Parmeswar ke
pahiela poestak me ke hai

© ALB Nederland
Alle rechten voorbehouden
Derde druk 2007 L

Pabiela baat

Jona ek Parmeswar ke sanesia raha. Oe Israel ke djaatie me ke raha aur sattja Parmeswar ke maanat raha.

Bakie ek dien djab Prabhoe oke ek doesar des me pathaais hoewa ke manai log se bataawe ke kie oesabke tjaahie aapan kharaab rasta tjhor dewe ke, tab oe thetharaai karies. Tabbo Parmeswar aapan kaam Jona ke dwaara poera karies. Ie kaahaanie dekha hai kie sab bhagwaan ek na hai. Khaalie ekgo sattja Parmeswar hai. Okar sab saktie hai aur oe na maange hai kie iensaan log sadja paaike naas karal djaai. Oe maange hai oesabke batjaawe. Bakie dje dje naklie bhagwaan maane hai, oelog Prabhoe ke bhalaai na maange hai aur hardam ke lieje ose alge karal djaaiga.

Parmeswar Jona ke kaun hoekoem deis

1 ¹ Ek dien PRABHOE Amietai ke beta Jona se bolies: “Toe apane ke tajaar kar ² aur barka sahar Nienafe me dja. Ham djaan gailie hai kie hoewa ke manai log bahoet kharaabie kare hai. Oesabse bataaw kie oelog sadja paawe laaik hai.”

³ Bakie Jona apane ke tajaar karies PRABHOE ke saamne se doesar or me Tarses sahar bhaage khaatien. Oe Jafo sahar gail aur hoewa par ekgo djahaadj paais djaun Tarses djaat. Tab oe paisa bharke djahaadj log ke sanghe hoewa djaai lagal. Aisane oe PRABHOE ke saamne se tjal gail.

⁴ Tab PRABHOE ek djabardjast hauwa samoendar par laais aur djanaail kie djahaadj tjoetat.

⁵ Tab djahaadj log deraail aur sabhan aapan aapan bhagwaan ke goharaais haath dewe khaatien. Tab oelog sab maal paanie me biege deis djahaadj auro halloek kare khaatien. Bakie Jona ekdam se nieltje tjal gail raha aur khoeb soetale me raha.

⁶ Tab djahaadj ke barkwa okar lage aail aur bolies: “Toe kaahe ke soetal baate? Oeth aur aapan bhagwaan se praatna kar. Saait oe hamlogke saarie kärke batjaai leiga, nahie to hamlog doeb djaai k’hoi.”

⁷ Etane me ekwan bolies: “Ie sab kekar kasoer hai? Aaw hamlog baadjie lagaaie dekhab hamlog kekar kasoer dwaara ie moesiebat me paral baatie.” Oesab tjienha biegies aur Jona kasoerwaar niekaral. ⁸ Tab oesab


ose poetjhies: “Toe kaun kaam kare hai? Kaaha se aawe hai? Toe kaun des aur djaatie me ke baate? Hamlogse bataaw.”

⁹ Tab oe bolies: “Ham Hebar ke djaatie me ke baatie aur ham swarag ke PRABHOE Parmeswar ke maaniela. Oe to samoendar aur djamien banaais hai.” ¹⁰ Aur djab oe oesabse bataais kie oe PRABHOE ke saamne se bhagal hai, tab sabhan bahoet deraail aur ose poetjhies: “Toe ka karle hai?”

¹¹ Samoedar ke halfa hardam auro djabar howat raha. Tab oesab ose poetjhies: “Hamlog tose ka karie djeme samoendar astiel howe?”

¹² Tab oe bolies: “Ham djaaniela kie hamaar kasoer se toelog ie barka hauwa ke bietj me phasal baate. Ohie se toelog hamme leike aur samoendar me phek de, tab samoendar astiel hoi djaaiga.”

¹³ Bakie aadmie log khewe lagal djahaadj djhoer djagaha lage



ledjaai khaatien. Djaise tem paas howat raha, taise samoendar auro djabardjast howat raha aur oesab djahaadj na khewe paais.

¹⁴ Tab oelog PRABHOE ke goharaais aur bolies: “PRABHOE djie, djab hamlog ie aadmie ke djiewan ek baliedaan ghat debe, tab hamlogke na maran deiho. Djab oe kasoerie na rahie, tab hamlogke djaanmarwa ghat na mariehe. Aap to PRABHOE baato aur djaun tjiedj mango hai, taun karo hai.”

¹⁵ Tab oesab Jona ke oethaaikke phek deis aur samoendar astiel hoi gail!

¹⁶ Tab djahaadj log PRABHOE ke bahoet biesaal maanies. Oesab okar khaatien baliedaan karies aur koetjh waada karies.

¹⁷ Etane me PRABHOE ek barka matjhrie Jona ke lage pathaais oke liel lewe khaatien. Aur Jona tien raat aur tien dien matjhrie ke pet me raha.

Jona ke praatna

2 ¹ Tab Jona matjhrie ke pet me se PRABHOE Parmeswar se praatna kare lagal. ² Oe bolies: “Djab ham moesiebat me rahielie, tab PRABHOE ke goharailie aur oe soenies.” Bolies: “Ham aapke maral manai ke djagaha me se goharailie hamme batjaawe khaatien.

Tab aap hamaar aawaadj soenlo. ³ Aap hamme gahier samoendar me biege dewailo rahielo. Sab alang se barka halfa hamme maarat raha.

⁴ Tab ham sotjlie: “Aap hamme na maange hai dekhe. Ab ham kabhie na aapke pawietr mahal phien se dekh paabe.” ⁵ Paanie hamme sagaro se gheries raha aur hamaar djiewan khatara me raha. Ham samoendar

me ekdam se nieltje rahielie. Samoendar me ke ghaas hamaar moer me laptiaal raha. ⁶ Ham etana gier gailie kie ham kabhie na oeppar djaitie.

Tab PRABHOE Parmeswar djie, aap hamaar djiewan maut me se batjailo aur hamme djaise kabar me se oeppar ghietjlo.

⁷ Bas djab ham mare par rahielie, tab ham PRABHOE ke jaad karlie aur hamaar praatna aapke pawietr mahal me soenaail.”

⁸ Bolies: “Dje dje naklie bhagwaan ke maane hai, oesab PRABHOE ke bhalaai na maange hai. ⁹ Bakie ham aapke dhanbaad deila aur baliedaan karab. Djaun tjiedj ham waada karlie hai, oke ham poera karab. PRABHOE to hamme batjaais hai.”

¹⁰ Tab PRABHOE matjhrie se bolies oke djhoer djagaha par oegale ke. Aur oe aisane karies.



Jona ke partjaar Nienafe sahar me

3 ¹ Tab PRABHOE Jona se phien se bolies: "Toe apane ke tajaar kar ² aur barka sahar Nienafe me dja. Aur djaise ham tose bataab, oisane hoewa ke manai log se partjaar kariehe." ³ Jona tajaar bhail aur gail. Nienafe ek bahoet barka sahar raha. Oe sahar tien dien me tjalke dekh sakat rahiele. ⁴ Tab Jona sahar me pahoetjal aur ek dien bhar tjalke manai log se djor se bolies: "Tjaalies (40) rodj auro, tab Nienafe naas karal djaaiga!"

⁵ Tab hoewa ke manai log ie Parmeswar ke baat bieswaas karies. Oesab sallaah karies rodja kie to bhoekha rahe ke. Aur tjhota se barka talak manai logan marnie ke kapra pahienies.

⁶ Tab djab Nienafe ke raadja ie baat soenies, tab oe oedaasie ke maare aapan gaddie par se oethal aur aapan oeppar ke kapra oetaarke marnie ke kapra pahienke djamen par baith gail. ⁷ Oe aur okar mantrie log sahar bhar me ailaan karwaais kie: “Sab manai, gaai-goroe, bhera kie to tjaahde djaun djanaawar log ke na tjaahie koetjh khaai aur pieje ke. Djanaawar log ke na tjaraaw kie to piejaaw.

⁸ Aadmie aur djanaawar log ke tjaahie marnie ke kapra pahiene ke. Sab koi ke tjaahie Parmeswar ke djor se praatna kare ke aur aapan paap pastaaike aapan kharaab rasta tjhor dewe ke. ⁹ Tab saait Parmeswar aapan man badalie aur aapan goessa tjhor dei aur hamlogke na naas kariega.”

¹⁰ Tab djab Parmeswar dekhies kaise oesabhan aapan tjaal tjalan badalies, tab oe faisala karies oesabke naas na kare ke.



Jona ke goessa

4 ¹ Ie baat Jona ke tanko na attjha lagal aur oe goessaail. ² Tab oe praatna kare lagal aur bolies: “He PRABHOE, djab ham abbe aapan des me rahielie, tab se ham ie baat djaanat rahielie. Ohie se ham maangat rahielie Tarses sahar bhaage. Ham to djaanat rahielie kie aap na maango hai manai log ke sadja dewe. Aap oesabke daaja aur bhalaii karlo hai. Aapke na attjha lage hai oesabke naas kare ke, bakie aap oelogke paap ke tjhama deilo hai.

³ PRABHOE, bestar hamme maran deiho. Mar djaai ke hamaar khaat auro attjha hai.” ⁴ Tab PRABHOE bolies: “Tor kaun hak hai goessaai khaatien?”

⁵ Etane me Jona sahar ke bahare poerab kait tjal gail raha. Hoewa par oe ekgo marai banaais. Tab oe ekar nieltje tjaahie me gail baithe dekhe khaatien kie sahar se ka hoiga.



⁶ Tab PRABHOE Parmeswar ekgo atjambho waala per oetpan karies oke auro tjaahie dewe ke aur oke khoesiaalie pahoetjaawe ke. Ie Jona ke bahoet attjha lagal!

⁷ Bakie djab saber bhail, tab Parmeswar ekgo kierwa se perwa ke sor khawaaai dharies. Tab oe djhoeraai gail. ⁸ Tab djab soeroedj aur tedj howe lagal, tab Parmeswar poerab kait se garam hauwa laais. Aur khoeb ghaam Jona ke moerie par maaries. Tab oe aphanaaieke gier paral aur bolies: “Bestar hai kie ham mar djaai.”

⁹ Bakie Parmeswar ose poetjhies: “Tor kaun hak hai perwa ke baare me goessaai khaatien?” Tab oe bolies: “Djie ha, ham etana goessa me baatie kie ham mar sakiela!” ¹⁰ Tab PRABHOE bolies: “Atjambho waala per toe na oetpan karle hai aur okar sewa bhie na. Perwa ek dien me bhail

aur ohie dien me mar gail. Tabbo toe na maangat rahiele kie oe mare.

¹¹ Tab ham kaahe ke Nienafe sahar ke naas karie? Hoewa par to ek sau bies hadjaar se djaada larkan aur bhie dher djanaawar hai. Aur oesabke to koetjh kasoer na hai.”